

女科準繩 四之二

胎前門

惡阻

胎動不安

胎上逼心

妊娠經來

漏胎下血

胎漏黃汁下或如豆汁

跌撲傷胎毒藥傷胎

心痛

心腹痛

腹痛

小腹

腰痛

及腎痛

惡阻 痰逆不食

惡阻謂嘔吐惡心頭眩惡食擇食是也 千金凡婦

人虛羸血氣不足腎氣又弱或當風飲冷太過心下有痰水者欲有胎而喜病阻所謂欲有胎者其人月水尙來顏色肌膚如常但苦沉重憤悶不欲食飲又不知其患所在脉理順時平和則是欲有娠也如此經二月以後便覺不通則結胎也阻病者患心中憤憤頭重眼眩四肢沉重懈惰不欲執作惡聞食氣欲噉鹹酸果實多臥少起世謂惡食甚至三四月日已上皆大劇吐逆不能自勝舉也此由經血既閉水漬

於藏藏氣不宜通故心煩憤悶氣逆而嘔吐也血脉不通經絡否澁則四肢沉重挾風則頭目眩也覺如此候者便宜服半夏茯苓湯數劑後將茯苓丸痰水消除便欲食也既得食力體強氣壯力足養胎母便健矣

〔大全〕妊娠稟受怯弱便有阻病其狀顏色如故脉息和順但覺肢體沉重頭目昏眩擇食惡聞食氣好食鹹酸甚者或作寒熱心中憤悶嘔吐痰水恍惚不能支持巢氏謂之惡阻但證有輕重耳輕者不服藥亦不妨重者須以藥療之千金方以半夏茯苓湯茯苓丸專治阻病然此二藥比來少有服者以半

夏有動胎之性蓋胎初結慮其易散此不可不謹也
張仲景傷寒論有用黃龍湯者小柴胡湯中去半夏
是也此蓋爲妊娠而設焉王子亨則有白朮散局方
則人參丁香散楊振則有人參橘皮湯齊士明則有
醒脾飲皆不用半夏用之多効 李茂翁云若左脉
弱而嘔服諸藥不止者當服理血歸原藥則愈經云
無陰則嘔是也 薛前證若中脘停痰用二陳湯加
枳殼若飲食停滯用六君子加枳殼若脾胃虛弱用
異功散若胃氣不足用人參橘皮湯兼氣惱加枳殼
胸脇痞悶再加蘇梗脇痛再加柴胡若飲食少思用

六君子加紫蘇枳殼頭暈體倦用六君子湯若脾胃
虛弱嘔吐不食用半夏茯苓湯蓋半夏乃健脾氣化
痰滯之主藥也脾胃虛弱而嘔吐或痰涎壅滯飲食
少思胎不安必用茯苓半夏湯倍加白朮然半夏白
朮茯苓陳皮砂仁善能安胎氣健脾胃予嘗用之驗
矣 痰逆不食證因食停滯用半夏茯苓湯加枳殼
兼氣惱更加柴胡因痰壅滯用半夏茯苓湯加白朮
因風寒外傷用參蘇飲飲食腹脹用香砂六君子湯
寒熱嘔吐人參養胃湯 一妊娠嘔吐惡食體倦嗜
臥此胃氣虛而惡阻也用人參橘皮湯二劑漸愈又

用六君加紫蘇二劑而安 一妊娠吞酸惡心時欲作嘔此因脾胃虛而飲食停滯用六君加枳殼香附治之而愈 一妊婦停食腹滿嘔吐吞酸作瀉不食余以爲飲食停滯兼肝木傷脾土用六君子湯以健脾胃加蒼朮厚朴以消飲食吳茱萸所製黃連以清肝火諸證悉愈又以六君加砂仁調理而脾土乃安 一妊婦嘔吐脇脹或寒熱往來面色青黃此木旺而尅脾土用六君子加柴胡桔梗枳殼而安 一妊婦嘔吐酸水胸滿不食此脾土虛而肝木所侮用六君子加芍藥而愈 一妊婦胸腹膨脹吐痰不食此

脾胃虛而飲食爲痰用半夏茯苓湯漸愈又用六君子加枳殼蘇梗桔梗而飲食如常後因恚怒脇脹不食吐痰惡心用半夏茯苓湯加柴胡山梔而愈汪石山治一婦形質瘦小面色近紫產後年餘經水不通首夏忽病嘔吐手指麻痺拳不能伸展聲音啞小噦不出聲醫皆視爲風病危之汪診脉皆細微近滑曰此妊娠惡阻病也衆謂經水不通安有妊理汪曰天下之事有常有變此乃事之變也脉雖細微似近于滑又尺按不絕乃妊娠也遂以四君子加二陳治之諸證俱減尚畏粥湯惟食乾糕香燥之物而有生

意 給事游讓溪夫人病新愈月餘經事不行嘔噦
眩暈飲食艱進醫以爲二陽之病發心脾女子不月
法在不治江瓘診之尺脉雖小按之滑而不絕此妊
而惡阻非凶候也六君加砂仁數服而安後產一女
金匱婦人得平脉陰脉小弱其人渴不能食無寒熱
名妊娠桂枝湯主之於法六十日當有此證設有醫
治逆者却一月加吐下者則絕之 婁全善曰絕之
者謂絕止醫治候其自安也予嘗治一二婦阻病吐
愈治愈逆因思仲景絕之之旨遂停藥月餘自安真
大哉聖賢之言也

例半夏

萬全方云凡妊娠惡食者以所思食任意食之必愈
仲景云妊娠嘔吐不止乾薑人參半夏丸主之

乾薑人參半夏丸

乾薑

人參

各壹兩

半夏

湯洗去滑貳兩

右三味末之以生薑汁糊爲丸如梧子大飲服拾

丸日三服

半夏茯苓湯

治妊娠惡阻嘔吐心煩頭目眩暈惡

聞食氣好食酸鹹多卧少起百節煩疼羸瘦有痰

胎孕不牢

半夏

洗壹兩貳錢半

赤茯苓

熟地黃

各柒錢半

橘紅

旋復花

千金方無旋復有細辛紫蘇

人參

芍藥

川芎

桔梗

甘草 各半兩

右咬咀每服伍錢薑柒片水煎空心服兼服茯苓
丸 若有客熱煩渴口瘡去橘紅細辛加前胡知
母柒錢半 若腹冷下痢去地黃加炒桂心半兩
若胃中虛熱大便秘小便赤澀加大黃柒錢半
去地黃加黃芩貳錢伍分

茯苓丸

治妊娠阻病心中煩悶吐痰眩暈先服半

夏茯苓湯兩劑後服此藥

赤茯苓

人參

桂心

乾薑

半夏

湯泡七次炒黃

橘皮

各壹兩

白朮

葛根

甘草

枳殼

各貳兩

右爲細末煉蜜丸如桐子大每服伍拾丸米飲下
日三服 一方加麥門冬 肘後加五味子
療妊娠心胸支滿痰逆不思飲食

赤茯苓

前胡

白朮

紫蘇葉

各壹兩

半夏

麥門冬

人參

大腹皮

各半兩

右爲粗末每服四錢水壹盞薑五片煎至柒分去滓溫服 一方無腹皮人參有大腹子檳榔
療妊娠心膈氣滯嘔吐不下飲水心神虛煩四肢少力

枇杷葉

半夏

麥門冬

人參

甘草 半兩

訶子肉

藿香 各壹兩

赤茯苓

枳殼

陳皮 各柒錢半

右㕮咀每服叁錢水壹盞薑叁片棗壹枚煎至柒分去滓溫服 一方無訶子及棗

集驗療婦人妊娠惡阻嘔吐不下食

青竹茹

橘皮

各叁兩

生薑

茯苓

各肆兩

半夏

伍兩

右細切以水陸升煮取貳升半去滓分三服不瘥

頻服忌羊肉餠鮓等物

旋復半夏湯 治妊娠惡阻吐逆酸水惡聞食氣多

臥少起

旋復花

去枝萼

川芎

細辛

去土

人參

甘草

炙各柒分

當歸

去蘆

半夏

湯泡

赤茯苓

去皮

乾生薑

陳皮

去白各壹錢伍分

右作一服水貳鍾薑五片煎至壹鍾不拘時服

旋復花湯

治妊娠六七個月胎不安嘔吐

旋復花

伍分

厚朴

白朮

枳殼

黃芩

茯苓

各壹錢伍分

半夏

芍藥

生薑

各壹錢

右作一服水貳鍾煎至壹鍾食前服

右諸方並用半夏蓋取其辛以散結氣瀉逆氣故

嘔惡自止非專爲痰設也婁全善曰大千方論半

夏動胎而不用仲景方乃用之予治妊娠阻病累

用半夏未嘗動胎也經云有故無殞是也

白朮散 治惡阻吐清水甚者害十餘日水漿不入

白朮 壹兩

人參 半兩

丁香 貳錢半

甘草 壹錢

右爲細末每服貳錢水壹盞薑伍片煎至柒分溫服

人參丁香散 治妊娠惡阻胃寒嘔逆翻胃吐食及心腹刺痛

人參

丁香

藿香葉 各貳錢半

右爲散每服叁錢水壹盞煎柒分去渣溫服無時

又方

人參

丁香

柿蒂各貳兩

甘艸

良薑各半兩

右爲細末每服貳錢熱湯點下無時

醒脾飲子 治妊婦阻病嘔逆不食甚者中滿口中

無味或作寒熱此出王氏博濟方

草豆蔻

以濕紙裹灰火中煨令紙乾取出去皮用

厚朴薑製各半兩

乾薑

壹兩

甘艸

壹兩貳錢半

右爲細末每服貳大錢水壹大盞棗貳枚生薑叁片煎至捌分去滓呷服病輕者只一兩服便能食

舊有橘紅貳兩治寒熱瘧痢不食後人去橘皮以
乾生薑代乾薑治老人氣虛大便秘少津液引飲
有奇效產科醫官齊士明依舊用乾薑去橘皮亦
名醒脾飲子治阻病極神驗

右諸方與前茯苓丸並用丁香乾薑惟中寒脉遲
者宜之

人參橘皮湯 治阻病嘔吐痰水

人參

橘皮

白朮

麥門冬

去心各壹兩

甘草

叁錢

厚朴

製

白茯苓

各伍錢